



Autodetermín, un derechu. Independencia, un modelu p'Asturies.

El pasáu 24 de febreru espublizábase na prensa asturiana la última encuesta del CIS sobre la opinión de les asturianos y los asturianos respecto a la realidá identitaria, social y política del nuesu país y del estáu español. Nella reflexóse que'l 89% de les persones encuestaes n'Asturies falen d'ella como "rexón" mentando un 6% como "nación". Per otru lláu, más d'un 76% tan "mui arguyoses" de ser asturianos, lo que constitúi prácticamente'l sentir d'arguyu propiu más altu de toles comunidaes del estáu español.

Nun momentu nel que se ta refaciendo'l modelu d'ordenación estatal nun podemos dexar de lláu conceptos tan importantes como los d'autodetermín o independencia. Bien ye cierto qu'Asturies, onde entá nun llegó a calar socialmente un modelu nacionalista que vaya más allá de la defensa de la llingua propia, nun s'amuesa anguaño preparao p'afrontar estes dos idees, lo cual nun quier dicir que na izquierda nacionalista arrenunciemos a facer emplegu de les mesmes y acutemos el derechu de siguir lluchando por algamales.

Falar d'autodetermín ye falar d'un derechu reconocíu internacionalmente y que permite qu'una comunidá d'habitantes tenga llexitimidá pa decidir el so propiu futuru colectivu y siguir el camín que-y pete como pueblu tal y como espeya la declaración d'Alxer del añu 1976. El nuesu país, una de les primeres naciones-estáu modernes d'Europa, ye güei, según l'estatutu de ruina autonomía, una "comunidá hestórica", frente a Galicia o Euskadi denominaes "nacionalidaes hestóriques" o Catalunya que yá ye una "nación" con toles de la llei.

La mocedá d'izquierda alternativa y asturianista que representamos nun puede nin ha d'escaecer enxamás esti derechu, que tien de

tar presente nes reivindicaciones polítiques a defender nos años vinientes. Asturies, como pueblu, tien de facer el so propiu camín, ensin mimetismos nin imitaciones con otros movimientos nacionalistes, pero deprendiendo de los aciertos y errores de caún d'ellos a lo llargo de la so llucha.

La independencia, como conceptu políticu ye la máxima espresión del derechu d'autodetermín d'un pueblu, constituyéndose n'estáu soberanu, con plena autonomía y ensin intervencionismu políticu y económicu dende acullá de les llendes alministratives establecées.

En Mocedá d'Izquierda Asturiana (mias>>) esti sentimiento d'independencia vívese y enfócase como reaición énte la probetaya "autonomía emprestada" que l'estáu español-y da a Asturies, énte la globalización qu'esfai los elementos más reconocibles de la nuesa identidá y asina como los del restu de cultures alreor del mundu, una globalización que fai por homoxeinizar les manifestaciones culturales, por eliminar les peculiaridaes p'asina esparder más fácil les xabaces práutiques neolliberales, siempre indignes pa los trabayadores y dafechu insostenibles dende un puntu de vista ecolóxicu.

Esta independencia desixida, lloñe de tener un calter escluyente col restu de pueblos de La Tierra, plantégase como un abellugu contra'l capitalismu sangrín que globaliza'l planeta al so favor mentando les oportunidaes y los derechos son cada vez más desiguales, como un nuevu espaciu de convivencia pa les persones nacées equí y pa los qu'aporten a Asturies en busca d'una vida digna -asturianos y asturianos toes- pa facer d'esti un llugar ricu cultural y socialmente, una sociedá moderna y abierta pa toles persones.

D'esti mou, dende Mocedá d'Izquierda Asturiana, lluchamos por una Asturies llibre na más amplia de les sos acepciones:

- Una Asturies llibre socialmente, faciendo una sociedá xusta, igualitaria, tresversal,

EL SOYÁU alternativu

Mayu 2006
Documentu 1



plural y abierta y esmolecida polos valores solidarios, de non discriminación por razones de sexu o preferencia sexual, opción relixosa o ideoloxía, pa poder trabayar a comuña na construcción del nuesu futuru.

- Una Asturias llibre pa cuidar de la naturaleza, pa poder algamar un país que faiga de la protección del mediu ambiente'l finxu básicu nel que se sofiten toles midíes de desarrollu tecnolóxicu y modernización. Un país que defenda la bayura ecolóxica que mos arrodiada y que-y vuelva'l so verdaderu valer, pa nós, incalculable, compatibilizándolo col avance punteru n'investigación y desarrollu.
- Una Asturias llibre pa desaniciar la explotación llaboral, les práutiques neoliberales qu'afueguen a les y los trabayadores pa que namás unes poques persones s'arriquezan. Llibertá pa finir cola precariedá llaboral de los contratos basura y les xornaes de trabayu llarguísimes a cambiu de xornaes indignos.
- Una Asturias llibre pa la difusión cultural en toles sos estayes, qu'ufierte una educación moderna, llaica, de calidá; que promueva l'arte, la música, les lletres dende una visión actual y renovadora y qu'esparda y promocióne la interculturalidá y la particularidá al empar de tolos pueblos de La Tierra.
- Una Asturias llibre política, económica y xurídicamente, pa que seyan les asturianos y los asturianos quien decidan el so futuru, les sos lleis, pa que los proyectos empobinaos a ameyorar esti país tean propuestos y llevaos a la realidá por y pa la xente asturiano, ensin inxerencies, intereses nin imposiciones dende fuera. Y ello nun pue llevar a escaecenos de sofitar y dar fuelgu a los

países vecinos, colos que queremos compartir, convivir solidariamente, colos que vamos facer por algamar un mundu meyor.

Por eso desiximos autodetermín p'Asturies, por eso lluchamos pola independencia, por una mocedá llibre que tome la iniciativa y decida. Agora ye'l tiempu de facer d'esti un movimientu que puxe, ensin complexos, dende la mocedá nacionalista d'izquierdes d'Asturies por una oportunidá pa consiguir un país llibre, dueñu del so destín, una oportunidá p'allugar a Asturias nel mundu, pa suñar con un planeta meyor, y, a mui curtiu plazu, pa facer qu'esi 76% de xente asturiano "mui arguyoso" de selo "cambie'l chip" y conduza positivamente esi sentimientu nel sentíu de defender un futuru meyor pa toes y toos dende equí: dende Asturias.

Agora que les opciones de trabayu queden dafechu limitaes pa la mocedá dientro d'Asturies y que la emigración forzada paez la única salida, agora, 30 años depués d'entamar el movimientu de reivindicación llingüística pola dignidá, y, poro, oficialidá del nuesu idioma, agora que la nuesa cultura ta nel cantu l'escaezu, agora que la xenofobia y el racismu espoxiguen na sociedá y que les llendes alministratives tienden a facese muries insalvables, agora que'l modelu económicu y social presiona a les persones más probes y marxinaes, agora cuando nel nuesu país y pesie a munchos años d'esfarrape mediuambiental, amenacen con incrementar les centrales enerxétiques pola mor d'un modelu sangrín, desequilibráu y foriatu, agora qu'asfalten la costa y los valles y desmonten el tarrén p'asitiar proyectos faraónicos que nun correspuenden coles necesidaes d'esti pueblu, agora que les muyeres siguimos ensin poder esfrutar de los mesmos derechos que los homes... güei, nesti intre, ye cuando la mocedá pasa a l'aición y sal a la cai cola reflexón y el trabayu, cola bandera de llucha (l'asturina), qu'asumimos como nuesa, la d'Asturies, que ye la del nuesu país, y con tola fuercia que trayemos les y los que queremos cambiar Asturias y el mundu.